

Sancte Lucia e le message del lumine

Un historia del die de Sancte Lucia, narrate per Kjell Rehnström de Uppsala in Svedia

Deman es le 13 de decembre, e le gente vivente in Svedia se collige pro celebrar “Lucia” [lūs'ia]. Le ideal es que un belle juvena entra le casa con un corona de candelas, illa es accompagnate per juvenas escortante e un gnomo. Illa offere bisquittes de pipere (compara le anglese *gingerbread*) e “cattas de Lucia” que es un pan ubi on ha safran in le testa. Le forma es – un poco – simile al symbolo sur le clave de “commando” sur un computator Mac! On bibe anque vino calide speciate. Lucia es le initiation del Natal, le *Yul* (*jul* in scandinavo).



Hmm. Isto es le ideal. Le realitate es sovente que le juventute – e plus avantiata in etate – imbibes un poco troppo de alcohol e es incapace de facer un efficace labor. Salvo le Natal il ha duo periodos o tempores que es incerte quanto a labor que on expecta, istos es Lucia e le chassa a alces. In certe partes del pais toto quasi stoppa pro le alces.

Ma Sancta Lucia, que es? Isto es un canto que on canta al mesme melodia que le canto italian, ma le texto non del toto narra del barco sur le baya de Napoli ma describe le die hibernal (que es plus tosto nocte).

Le nocte vade per passos pesante circum corte e casa, sur le terra oblidate per le sol, e subito illa sta al porta, le belle, lumineuse Lucia. Illa dice a nos un meraviliose parola: “Le alba del die va retornar!”

Considera, car amicos, que le die habera sur mi latitudine solo 6 horas e duo minutas deman, le 13 de decembre! Secundo le vetere calendario le 13 de decembre era le plus longe nocte del anno. Secundo le presente calendario isto es le 21 de decembre.

Pro iste ration calendari il ha un massa de superstition in re le nocte de Lucia. Diabolos e esseres magic es in action como un emotionante passage in alcun del libros de Harry Potter, e in vetere tempores le population non osava dormir. E si on non pote dormir, on mangia e bibe...

In mi infantia on pensava que omne le cosas, pupas etc., con le quales le infantes joca, deveni vivente ille nocte. Al hora 12.

Resta me per consequente solo desirar a vos omnes un magic e agradabile Lucia! Non bibe troppo! :-)

Kjell R.